



Il davos cumbat a Mollis dad Armon Orlik – cun la victoria cunter Pirmin Reichmuth – è stà ina demonstraiziun da forza. FOTO MICHAEL BUHOLZER/KEYSTONE

«Tut ha funcziunà dad a fin z»

Armon Orlik è daventà retg da la lutga federala a Mollis (GL) – ed era l'emprim retg da lutga grischun insumma. En il discurs cun RTR ha il nov retg recapitulà la via tar sia victoria.

RTR/FMR

Malgrà ch'Armon Orlik n'ha betg cumbatti en la lutga finala – ils giurors avevan elegì Samuel Giger e Werner Schlegel per quella – po il lutgader da Maiavilla ussa sa numnar retg da la lutga. El ha profità dal pari en la lutga finala ed è daventà l'emprim retg da lutga grischun. En il discurs cun RTR ha Armon Orlik recapitulà la festa da lutga federala a Mollis (GL).

RTR: Armon Orlik, nus gratulain. Vus essas il nov ed insumma l'emprim retg da la lutga grischun!

Armon Orlik: Quai è bellezza. Jau sun ordvart ventiraivel. Igl è incredibel ed jau ma legr propi da cor.

Durant dus dis avais Vus lutgà sensaziunalmain. Ins ha gì l'impressiun che Vus essas propi stà pront e focussà da lutga tar lutga, ma era luc. È tut ò si sco giavischà?

Gea, vairamain. Ina tala festa da lutga pretendia uschè blera energia. Ins na po gnanca sa revegnir endretg tranter las singulas lutgas. Ma tuttina ston ins empruvar da pusar, da spargnar energia e da star ruassaivel. E cunzunt ston ins adina crair en sasez ed en l'atgna preparaziun.

E quai è para stà il cas tar Vus?

Gea, igl è propi stà uschia. Tut ha funcziunà dad a fin z. Ma igl è era stà ina prestaziun enorma da l'entir team. Igl è stà in grond levigament suenter la 7avla lutga che dus lutga-

ders da l'Associaziun da lutga da la Svizra Nordorientala han cuntanschì la lutga finala. Uschia avain nus cuntanschì la finamira che nus avain gì sco gruppa. Da cuntanscher insatge sco gruppa vala la finala bler dapli che cuntanscher finamiras individualas.

Ma tuttina ston ins lutar e gudagnar persul?

Quai è uschia, e quai è era reussì a mai. Jau hai dà tut e cuntanschì mias finamiras. Ussa sun jau enorm losch da mia prestaziun.

La festa da lutga ha era fatg plaschair a Grischunas e Grischuns – ed ins avess bunamain dastgà spepar sin ina lutga finala tranter ils frars Orlik?

Gea, quai fiss stà fenomenal. Deplorablamein n'esi betg stà uschia la finala, ma i fiss stà in'enorm bella istorgia.

Ma tuttina – igl è per Vus er uschia stà ina bella istorgia. Anc avant nov onns avais Vus pers la lutga finala.

Avant nov onns è quai stà per mai in pau nunspetgà. Uschè giuven pens'ins ch'ins haja alura ina segunda chaschun da gudagnar insacura ina lutga finala ad ina festa federala. Ma ina tala schanza han ins per regla mo ina giada. Ch'igl è tuttina reussì, quai ma legra tant pli fitg ed i na pudess betg esser pli bel.

Maiavilla festivescha ses «retg dals nauschs» la mesemna saira. Quai ha la famiglia dad Armon Orlik ditg envers RTR. In cortegi duai manar il nov retg da la staziun da Maiavilla tar il center dal vitg.



Armon Orlik cun il taur victur – il nov retg è dentant sa decedì per la cuntravalur dal taur. FOTO KEYSTONE

Il victur Armon Orlik na vul betg il taur

Sco victur da la festa da lutga a Mollis avess Armon Orlik atgnamain gudagnà l'uschenumnà «muni», in giuven taur da passa ina tonna pais. Sco ch'il nov retg da la lutga ha ditg envers la SDA, desista el dentant dal taur: «Jau ma sun decedì da prender encunter la valur dal taur en daners. Quai hai jau quasi adina fatg uschia. Jau na sun nagin pur, mabain inschigner da construcziun. Damai ma cunvegnan plitost ils daners ch'il taur.» Vul dir ch'Armon Orlik retschaiva enstagl dal «muni» pli u main 30 000 francs. (sda/fmr)

LUFS

Chantuns vulan sajettar lufs e luffins preventivamain

Sis chantuns vulan sajettar quest onn a moda preventiva lufs. A partir dad ier, il prim da settember, pon ils chantuns laschar lubir da sajettar lufs cun cundiziuns definidas. Dumandà per la lubientscha da la Confederaziun han ils chantuns Grischun, Vallais, Tessin, Son Gagl, Sviz e Vad, sco quai ch'in document da l'Uffizi federal d'ambient mussa.

En tut pertutgan las dumondas pli che 32 trieps da lufs en Svizra. Dus trieps en il Vallais ed in en il Vad duain svanir dal tut. Tar ils ulteriurs trieps vulan ils chantuns sajettar dus terzs dals luffins, naschids en il decurs da l'onn. Las pli bleras dumondas ha inoltrà il chantun Grischun. Questas pertutgan en tut 17 trieps – in da quels ensemen cun il chantun Son Gagl. Las dumondas per ils trieps da Calderas, Muchetta, Jatzhorn, Alpetli, Seta e Stagias èn gia approvadas. (rtr/fmr)



In luf fotografà l'onn 2024 en Engiadina dad ina trapla fotografica FOTO UFFIZI DA CHATSCHA E PESTGA


CHASA EDITURA RUMANTSCHA

Nov cudesch dad Asa Hendry

La Chasa Editura Ruman-tscha ha sco ch'ella scriva en ina communicaziun a las medias grond plaschair da publictar cun «archiv» in text da teater dad Asa Hendry che va sut la pel. En ina lingua poetica e reducida tracta il monolog il taschair en il context famigliar e l'ierta da l'agricultura alpina. El avra uschia novas perspectivas sin il teater rumantsch. En il center stat la relaziun dal giuven raquintader cun ses bab silenzius – in um marcà da greva lavur e plain istorgias taschentadas. En 14 maletgs expressivs raquinta il figl la suletta istorgia ch'il bab ha confidà – e reflectescha sia rolla sco archiv dal bab, dal silenzi e da la cuntrada alpina.

Il text, onurà cun il Premi Travers Zuoz 2024, examinescha tenor la communicaziun en maniera differenziada, co che masculinitad egemoniala, relaziuns en famiglia e traumas tranter las generaziuns sa scrivan en il corp ed en la lingua. La cuntrada alpina gioga ina rolla activa en quest conflict, è patria, sfida e surfatscha da projecziun enina. Il text dad Asa Hendry cumpara sco ediziun bilingua (sursilvan/ tudestg) en la retscha Ord chadaina. (cdm/fmr)

La vernissascha dal cudesch «archiv» ha lieu il 1. da november 2025 a las 17.00 en il rom dals Dis da litteratura en la Postremise Cuira – cun ina prelecziun performativa, suenter apero e la pussaivladad da guardar il teater la saira. Il cudesch po vegnir retratg en las librarías ubain via www.chasaeditura.ch.



Il nov cudesch dad Asa Hendry cun in text da teater. FOTO CHASA EDITURA RUMANTSCHA

LA CIFRA DAL DI

4,8 uras megawatt

forza electrica consumescha ina Svizra u in Svizzer en media per onn. Questa stimaziun ha calculà la plattform online «Energie Schweiz». Tenor Velobiz.de saja quai bunamain la quantidad forza electrica che 176 ciclists dal Tour de France genereschon durant l'entira cursa. Per cumparegliaziun: En ils Stadis Unids da l'America vegnan 7,7 uras megawatt consumadas, en l'Italia mo 2,9. (fmr/aj)